

Broj: 03-02-652/2026
Sarajevo, 10.04.2026. godine

**PARLAMENT FEDERACIJE
BOSNE I HERCEGOVINE**

- Predstavnički dom -

- Dom naroda -
gosp. Tomislav Martinović, predsjedavajući

Poštovani,

U skladu sa članom IV.B.3.7.c) (III) Ustava Federacije Bosne i Hercegovine, a u vezi sa čl. 163., 164. i 165. Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08, 26/20 i 13/24) i sa čl. 155., 156. i 157. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09, 24/20 i 60/24), radi razmatranja i prihvatanja, dostavljam Vam **NACRT ZAKONA O USLOVIMA ZA OBAVLJANJE POSLOVA ŠPEDICIJE RADI ZASTUPANJA U CARINSKI ODOBRENOM POSTUPANJU ILI UPOTREBI ROBE**, koji je utvrdila Vlada Federacije Bosne i Hercegovine na 69. sjednici, održanoj 09.04.2026. godine.

Nacrt zakona se dostavlja na službenim jezicima i pismima Federacije Bosne i Hercegovine u printanoj i elektronskoj formi (CD).

S poštovanjem,



Prilog:

- Nacrt zakona na bosanskom jeziku (CD)
- Izjava o usklađenosti
- Obrazac broj 1a
- Obrazac broj 2
- Obrazac IFP-NE

**Co: Federalno ministarstvo trgovine
gosp. Amir Hasičević, ministar**

**BOSNA I HERCEGOVINA
FEDERACIJA BOSNE I HERCEGOVINE
VLADA**

„EI“

NACRT

**ZAKON O USLOVIMA ZA OBAVLJANJE POSLOVA ŠPEDICIJE RADI
ZASTUPANJA U CARINSKI ODOBRENOM POSTUPANJU ILI UPOTREBI ROBE***

Sarajevo, april 2026. godine

ZAKON O USLOVIMA ZA OBAVLJANJE POSLOVA ŠPEDICIJE RADI ZASTUPANJA U CARINSKI ODOBRENOM POSTUPANJU ILI UPOTREBI ROBE

I. OSNOVNE ODREDBE

Član 1. (Predmet)

Ovim zakonom propisuju se uslovi koje mora ispunjavati privredno društvo za obavljanje poslova špedicije radi zastupanja u carinski odobrenom postupanju ili upotrebi robe, postupak izdavanja odobrenja - licence za obavljanje poslova špedicije radi zastupanja u carinski odobrenom postupanju ili upotrebi robe, stručni ispit za obavljanje poslova špedicije radi zastupanja u carinski odobrenom postupanju ili upotrebi robe, prestanak važenja odobrenja - licence te nadzor nad primjenom ovog zakona na području Federacije Bosne i Hercegovine (u daljem tekstu: Federacija BiH).

Član 2. (Usklađivanje s pravnom stečevinom Evropske unije)

Ovim zakonom u zakonodavstvo Federacije Bosne i Hercegovine djelimično se preuzima Uredba (EU) br. 952/2013 Evropskog parlamenta i Vijeća od 9. oktobra 2013. o Carinskom zakoniku Unije (preinaka), SL L 269, 10.10.2013, posljednja pročišćena verzija od 12.12.2022. godine.

Član 3. (Rodno značenje)

Gramatički izrazi upotrijebljeni u ovom zakonu podrazumijevaju uključivanje i ravnopravnu upotrebu riječi oba spola.

Član 4. (Osnovni pojmovi)

Pojmovi koji se upotrebljavaju u ovom zakonu imaju sljedeće značenje:

- a) Poslovima špedicije radi zastupanja u carinski odobrenom postupanju ili upotrebi robe smatraju se poslovi organiziranja, otpremanja i dopremanja robe u međunarodnom prometu koje privredno društvo obavlja u svoje ime i za račun nalogodavca, u ime i za račun nalogodavca, odnosno u svoje ime i za svoj račun, kao i obavljanje drugih uobičajenih poslova i radnji u vezi s špedicijom, uz naknadu, a u svrhu zastupanja u carinski odobrenom postupanju ili upotrebi robe.
- b) Zastupanje u carinski odobrenom postupanju ili upotrebi robe uključuje poduzimanje radnji i postupaka u skladu sa carinskim propisima pred Upravom za indirektno oporezivanje Bosne i Hercegovine.
- c) Privredno društvo za obavljanje poslova špedicije radi zastupanja u carinski odobrenom postupanju ili upotrebi robe je privredno društvo registrovano za obavljanje poslova špedicije (u daljem tekstu: društvo za špediciju) koje ima sjedište ili podružnicu na području Federacije BiH i koje je upisano u Registar društava za špediciju.

- d) Odobrenjem - Licencom se smatra rješenje izdato od Federalnog ministarstva trgovine (u daljem tekstu: Ministarstvo) kojim se utvrđuje da društvo za špediciju ispunjava uslove za obavljanje poslova špedicije radi zastupanja u carinski odobrenom postupanju ili upotrebi robe propisane ovim zakonom i da je upisano u Registar društava za špediciju (u daljem tekstu: licenca).
- e) Registar društava za špediciju je registar u koji se upisuju podaci o društvima za špediciju kojima je Ministarstvo izdalo licencu za obavljanje poslova špedicije radi zastupanja u carinski odobrenom postupanju ili upotrebi robe.
- f) Špediter je fizičko lice koje je položilo stručni ispit za obavljanje poslova špedicije radi zastupanja u carinski odobrenom postupanju ili upotrebi robe pred komisijom osnovanom od strane federalnog ministra trgovine (u daljem tekstu: ministar) i koja je upisana u Registar špeditera.
- g) Uvjerenje o položenom stručnom ispitu je uvjerenje izdato od strane Ministarstva kojim se utvrđuje da je fizičko lice zaposleno u društvu za špediciju položilo stručni ispit za obavljanje poslova špedicije radi zastupanja u carinski odobrenom postupanju ili upotrebi robe.
- h) Registar špeditera (u daljem tekstu: Registar) je registar u koji se upisuju podaci o fizičkim licima kojima je Ministarstvo izdalo uvjerenje za obavljanje poslova špedicije radi zastupanja u carinski odobrenom postupanju ili upotrebi robe.

Član 5.
(Neprenosivost licence i uvjerenja)

Licenca za obavljanje poslova špedicije radi zastupanja u carinski odobrenom postupanju ili upotrebi robe i uvjerenje o položenom stručnom ispitu za špeditera izdati u skladu sa ovim zakonom nisu prenosivi.

II. USLOVI ZA OBAVLJANJE POSLOVA ŠPEDICIJE RADI ZASTUPANJA U CARINSKI ODOBRENOM POSTUPANJU ILI UPOTREBI ROBE

Član 6.
(Uslovi za izdavanje licence i upis u Registar društava za špediciju)

- (1) Uslovi koje mora ispunjavati društvo za špediciju su:
 - a) da ima registrovano sjedište ili podružnicu na području Federacije BiH,
 - b) da je djelatnost društva za špediciju djelatnost koja obuhvata špediciju, odnosno djelatnost carinskih zastupnika,
 - c) da društvo ima registrirano vanjskotrgovinsko poslovanje koje uključuje i međunarodnu špediciju,
 - d) da ima zaposleno najmanje jedno lice koje ima položen stručni ispit iz člana 8. ovog zakona na puno radno vrijeme i koje je upisano u Registar špeditera,
 - e) ima odgovarajući poslovni prostor za obavljanje djelatnosti špedicije radi zastupanja u carinski odobrenom postupanju ili upotrebi robe u skladu sa članom 7. ovog zakona,
 - f) da raspolaže odgovarajućom opremom i uređajima za nesmetano obavljanje djelatnosti špedicije radi zastupanja u carinski odobrenom postupanju ili upotrebi robe u skladu sa članom 7. ovog zakona,
 - g) da ima licencu za obavljanje poslova špedicije radi zastupanja u carinski odobrenom postupanju ili upotrebi robe u skladu sa ovim zakonom,
 - h) da nije u stečaju, odnosno likvidaciji,

- i) da mu pravomoćnom sudskom presudom, rješenjem o prekršaju ili upravnim aktom nije izrečena zaštitna mjera zabrane obavljanja djelatnosti dok ta mjera traje,
 - j) da nema dospjelih, a neizmirenih poreskih obaveza po osnovu direktnih i indirektnih poreza.
- (2) Radno vrijeme na graničnom prijelazu društvo za špediciju je dužno na odgovarajući način uskladiti s radnim vremenom nadležne carinarnice, odnosno carinske ispostave, a u skladu sa važećim propisima.
 - (3) Društvo za špediciju u sjedištu privrednog društva mora imati zaposlenog najmanje jednog špeditera na puno radno vrijeme i najmanje po jednog špeditera na puno radno vrijeme u podružnici privrednog društva ukoliko djelatnost obavlja u podružnici privrednog društva.

Član 7.

(Uslovi u pogledu poslovnih prostora)

- (1) Za obavljanje poslova špedicije radi zastupanja u carinski odobrenom postupanju ili upotrebi robe društvo za špediciju dužno je osigurati minimalno-tehničke uslove koji se tiču opremljenosti poslovnih prostora, opreme i uređaja.
- (2) Uslove u pogledu minimalne tehničke opremljenosti poslovnih prostora, opreme i uređaja u poslovnim prostorima propisati će ministar podzakonskim aktom koji će sadržavati i izgled i sadržaj obrasca izjave iz stava (5) ovog člana.
- (3) Poslovni prostor iz st. (1) i (2) ovog člana su prostorije izgrađene u skladu sa urbanističko-građevinskim propisima, a to utvrđuje nadležni organ rješenjem o upotrebnoj dozvoli.
- (4) Prostor, oprema i uređaji za obavljanje poslova špedicije radi zastupanja u carinski odobrenom postupanju ili upotrebi robe, osim uslova iz st. (2) i (3) ovog člana, moraju udovoljavati i propisima o tehničkoj opremljenosti, zaštiti na radu, zaštiti i unapređenju čovjekove okoline, zaštiti od buke, zdravstvenim i sanitarnim uslovima, građevinskim, urbanističkim, protupožarnim te drugim propisima odnosno standardima.
- (5) Ispunjenost uslova iz st. (2), (3) i (4) ovog člana se pretpostavlja podnošenjem ovjerene pisane izjave od strane društva za špediciju u postupku izdavanja licence u skladu sa ovim zakonom.
- (6) Ispunjenost uslova iz st. (2), (3) i (4) ovog člana, u skladu sa zakonom koji uređuje oblast inspekcijskih poslova, utvrđuju nadležne inspekcije u redovnom inspekcijskom nadzoru.
- (7) Rješenje o upotrebnoj dozvoli nije uslov za donošenje rješenja iz člana 9. stav (1) ovog zakona, ali se ta činjenica provjerava zajedno sa utvrđivanjem ispunjenosti uslova iz st. (2) i (3) i (4) ovog člana.

Član 8.

(Stručni ispit za obavljanje poslova špedicije radi zastupanja u carinski odobrenom postupanju ili upotrebi robe)

- (1) Stručna osposobljenost za obavljanje poslova špedicije radi zastupanja u carinski odobrenom postupanju ili upotrebi robe utvrđuje se polaganjem stručnog ispita za obavljanje poslova špedicije radi zastupanja u carinski odobrenom postupanju ili upotrebi robe (u daljem tekstu: stručni ispit).

- (2) Fizičko lice zaposleno u društvu za špediciju može obavljati poslove špeditera ako ima položen stručni ispit iz stava (1) ovog člana.
- (3) Fizičko lice može polagati stručni ispit iz stava (1) ovog člana ako ima najmanje završeno srednje obrazovanje u četvorogodišnjem trajanju.
- (4) Fizičko lice iz stava (2) ovog člana polaže stručni ispit pred komisijom koju rješenjem imenuje ministar na razdoblje od dvije godine.
- (5) Fizičkom licu koje je položilo stručni ispit Ministarstvo izdaje uvjerenje o položenom stručnom ispitu.
- (6) Fizičko lice iz stava (2) ovog člana plaća troškove polaganja stručnog ispita u visini od 40 % minimalne neto plaće u Federaciji BiH.
- (7) Tačan iznos visine troška polaganja stručnog ispita utvrdit će federalni ministar trgovine podzakonskim aktom krajem svake godine, za sljedeću godinu.
- (8) Prihodi iz stava (6) ovog člana predstavljaju javne prihode, i uplaćuju se na depozitni račun Budžeta Federacije BiH.
- (9) Ministarstvo vodi Registar špeditera u pisanom i elektronskom obliku.
- (10) Ministar će podzakonskim aktom propisati program, uslove i način polaganja stručnog ispita, imenovanje i sastav komisije, sadržaj i oblik uvjerenja o položenom stručnom ispitu, kao i sadržaj i način vođenja Registra špeditera.
- (11) Sastav komisije odražavati će ravnopravnu zastupljenost spolova.
- (12) Statistički podaci u Registru špeditera razvrstavaju se po spolu i dostupni su javnosti.

Član 9.

(Zahtjev za izdavanje licence i upis u Registar društava za špediciju)

- (1) Za obavljanje poslova špedicije radi zastupanja u carinski odobrenom postupanju ili upotrebi robe društvo za špediciju mora imati licencu i biti upisano u Registar društava za špediciju.
- (2) Zahtjev za izdavanje licence i upis u Registar društava za špediciju, društvo za špediciju na propisanom obrascu podnosi Ministarstvu.
- (3) Uz zahtjev iz stava (2) ovog člana prilaže se:
 - a) Izvod iz sudskog registra društva sa registrovanim vanjskotrgovinskim poslovanjem koje uključuje međunarodnu špediciju, ne stariji od 30 dana,
 - b) ID porezni broj društva za špediciju,
 - c) spisak špeditera društva za špediciju koji će obavljati poslove špedicije radi zastupanja u carinski odobrenom postupanju ili upotrebi robe u društvu za špediciju na lokaciji gdje će se obavljati djelatnost,
 - d) ovjerena i potpisana pisana izjava društva za špediciju da su ispunjeni propisani uslovi koje moraju ispunjavati poslovne prostorije, oprema, uređaji pomoću kojih se obavlja djelatnost u skladu sa podzakonskim aktom iz člana 7. stav (2) ovog zakona.
 - e) ugovor o radu na puno radno vrijeme s špediterom i prijava osiguranja (obrazac JS 3100),
 - f) uvjerenje suda da nije izrečena mjera zabrane obavljanja djelatnosti,
 - g) dokaz o vlasništvu, pravu korištenja ili zakupu poslovnog prostora gdje će se obavljati djelatnost,
 - h) uvjerenja nadležnih organa o izmirenim poreskim obavezama po osnovu direktnih i indirektnih poreza.
- (4) Ministar podzakonskim aktom propisuje izgled i sadržaj obrasca zahtjeva iz stava (2) ovog člana.

- (5) Podnositelj zahtjeva je odgovoran za:
 1. tačnost i potpunost informacija navedenih u zahtjevu iz stava (2) ovog člana,
 2. vjerodostojnost, tačnost i valjanost isprava iz stava (3) ovog člana.
- (6) Za izdavanje licence podnositelj zahtjeva je dužan platiti taksu u skladu sa propisom o federalnim administrativnim taksama.
- (7) Prihodi iz stava (6) ovog člana predstavljaju budžetske nenamjenske prihode, i uplaćuju se na depozitni račun Budžeta Federacije BiH.

Član 10.

(Rješenje o ispunjavanju uslova za obavljanje poslova špedicije radi zastupanja u carinski odobrenom postupanju ili upotrebi robe i upisu u Registar društava za špediciju)

- (1) Rješenje o licenci za obavljanje poslova špedicije radi zastupanja u carinski odobrenom postupanju ili upotrebi robe i upisu u Registar društava za špediciju donosi Ministarstvo na zahtjev društva za špediciju, u roku od 15 dana od dana od dana prijema urednog zahtjeva.
- (2) Licencom iz stava (1) ovog člana utvrđuje se da društvo za špediciju ispunjava uslove za obavljanje poslova špedicije radi zastupanja u carinski odobrenom postupanju ili upotrebi robe propisane ovim zakonom.
- (3) Protiv rješenja iz stava (1) ovog člana žalba nije dozvoljena, ali se može tužbom pokrenuti upravni spor kod nadležnog suda.
- (4) U postupku donošenja rješenja iz stava (1) ovog člana, na pitanja koja nisu uređena ovim zakonom, na odgovarajući način se primjenjuju odredbe Zakona o upravnom postupku („Službene novine Federacije BiH“, br. 2/98, 48/99 i 61/22).

Član 11.

(Registar društava za špediciju)

- (1) Registar društava za špediciju u pisanoj i elektronskoj formi vodi Ministarstvo.
- (2) Oblik, sadržaj i način vođenja Registra društava za špediciju podzakonskim aktom propisuje ministar.

Član 12.

(Javnost Registra društava za špediciju)

- (1) Registar društava za špediciju je javan i sva lica mogu besplatno vršiti uvid u podatke koji se vode u Registru društava za špediciju, bez ograničenja.
- (2) Ministarstvo objavljuje Registar društava za špediciju na Internet stranici Ministarstva.

Član 13.

(Izvod iz Registra društava za špediciju)

Na zahtjev zainteresiranog lica Ministarstvo izdaje izvod iz Registra društava za špediciju, u roku od pet dana od dana prijema zahtjeva.

Član 14.

(Izmjena licence i promjena podataka u Registru društava za špediciju)

- (1) Društvo za špediciju je dužno podnijeti zahtjev za izmjenu licence u slučaju svake promjene podataka koja utiče na ispunjenost uslova za obavljanje djelatnosti propisanih članom 6. ovog zakona ili promjene podataka koji se upisuju u Registar društava za špediciju, u roku od osam dana od dana nastanka promjene, radi donošenja rješenja o izmjeni licence i upisa promjene podataka u Registar društava za špediciju.
- (2) Za izdavanje rješenja o izmjenama na licenci i upisu izmjena u Registar društava za špediciju društvo za špediciju je dužno platiti taksu u skladu sa propisom o federalnim administrativnim taksama.
- (3) Ministarstvo vrši izmjene licence i izmjenu podataka u Registru društava za špediciju po zahtjevu iz stava (1) ovog člana i po službenoj dužnosti na osnovu podataka iz službenih evidencija nadležnih organa, kao i podataka utvrđenih u postupku nadzora koji se provodi u skladu sa ovim zakonom.

Član 15.

(Ukidanje licence i brisanje iz Registra društava za špediciju)

- (1) Društvu za špediciju se ukida licenca i briše iz Registra društava za špediciju rješenjem Ministarstva u sljedećim slučajevima:
 - a) ako prestane da ispunjava neki od uslova iz člana 6. ovog zakona,
 - b) ako mu pravomoćnom sudskom presudom, rješenjem o prekršaju ili upravnom aktom bude izrečena mjera zabrane obavljanja privredne djelatnosti, dok ta mjera traje,
 - c) na zahtjev društva za špediciju.
- (2) Rješenje o ukidanju licence i brisanju iz Registra društava na osnovu stava (1) tač. a) i b) ovog člana Ministarstvo donosi po službenoj dužnosti na osnovu podataka iz službenih evidencija nadležnih organa, kao i podataka utvrđenih u postupku nadzora koji se provodi u skladu s ovim zakonom.
- (3) Protiv rješenja iz stava (1) ovog člana žalba nije dozvoljena, ali se može tužbom pokrenuti upravni spor kod nadležnog suda.

Član 16.

(Obaveza izvještavanja Ministarstva)

- (1) Društvo za špediciju dužno je jednom godišnje, a najkasnije do 31.03. tekuće godine, Ministarstvu dostaviti izvještaj sa dokumentacijom iz koje se može utvrditi da nisu prestali zakonski uslovi za obavljanje poslova špedicije radi zastupanja u carinski odobrenom postupanju ili upotrebi robe.
- (2) Ministar će podzakonskim aktom propisati oblik, sadržaj i način dostavljanja izvještaja.

III. NADZOR

Član 17.

(Upravni i inspeksijski nadzor)

- (1) Upravni nadzor nad provođenjem ovog zakona i propisa donesenih na osnovu

- ovog zakona vrši Ministarstvo.
- (2) Inspekcijski nadzor nad provođenjem ovog zakona i propisa, donesenih na osnovu ovog zakona, vrši Federalna uprava za inspekcijske poslove posredstvom federalnih tržišno-turističko-ugostiteljskih inspektora, kantonalni inspekcijski organi posredstvom kantonalnih tržišno-turističkih inspektora i drugi inspekcijski organi svako u okviru svoje nadležnosti, u skladu sa ovlaštenjima propisanim ovim zakonom i propisima kojima se uređuje inspekcijski nadzor.

Član 18.

- (1) Nadležni inspektor će društvu za špediciju rješenjem zabraniti obavljanje djelatnosti špedicije radi zastupanja u carinski odobrenom postupanju ili upotrebi robe do otklanjanja nepravilnosti, utvrđenih nalazom inspektora, ako prilikom nadzora utvrdi:
- a) da se djelatnost špedicije radi zastupanja u carinski odobrenom postupanju ili upotrebi robe obavlja bez prethodno izdane licence Ministarstva i upisa u Registar društava za špediciju,
 - b) da u poslovnom prostoru nisu ispunjeni zakonom propisani tehnički i drugi uslovi za obavljanje djelatnosti špedicije radi zastupanja u carinski odobrenom postupanju ili upotrebi robe,
 - c) da je društvo za špediciju počelo raditi u poslovnom prostoru, a da prethodno nije podnijelo izjavu iz člana 9. stav (3) tačka e) ovog zakona.
- (2) Žalba protiv rješenja ne odlaže izvršenje rješenja.
- (3) Nakon što je rješenje postalo izvršno, inspektor će utvrditi je li rješenje izvršeno te, ako nije izvršeno, bez odgađanja će pokrenuti postupak za njegovo izvršenje i donijeti zaključak o dozvoli izvršenja po službenoj dužnosti, te izvršiti pečačenje objekta u kojem je zabranjen rad.
- (4) Kada društvo za špediciju obavijesti inspektora da su otklonjeni nedostaci koji su bili razlog pečačenja, inspektor koji je rješenjem odredio zabranu rada, odmah će izdati nalog odnosno lično izvršiti skidanje pečata.

Član 19.

- (1) Ako se prilikom nadzora utvrdi da se djelatnost špedicije radi zastupanja u carinski odobrenom postupanju ili upotrebi robe obavlja mimo izdate licence Ministarstva i da su poslovni prostori, uređaji i oprema namijenjeni za obavljanje djelatnosti prestali ispunjavati propisane minimalne tehničke uslove, kao i uslove tehničke opremljenosti i da je društvo za špediciju podnijelo netačnu izjavu iz člana 9. stav (3) ovog zakona tržišni inspektor će rješenjem odrediti rok do kojeg se nedostaci moraju otkloniti.
- (2) Ako se nedostaci iz stava (1) ovog člana ne otklone u određenom roku, tržišni inspektor donijeti će rješenje o zabrani obavljanja djelatnosti, o zatvaranju prostora odnosno zabrani upotrebe uređaja i opreme.
- (3) U slučaju teže povrede higijensko-sanitarnih, zdravstvenih i tehničkih uslova zbog kojih mogu nastati teže posljedice po zdravlje i život ljudi, nadležni inspektor će donijeti rješenje kojim će odmah zabraniti obavljanje te djelatnosti dok se utvrđeni nedostaci ne otklone.
- (4) Žalba protiv rješenja iz st. (2) i (3) ovog člana ne odlaže izvršenje rješenja.

IV. KAZNENE ODREDBE

Član 20.

- (1) Novčanom kaznom u iznosu od 2.000,00 do 10.000,00 KM kaznit će se za prekršaj pravno lice ako:
 - a) ako obavlja poslove špedicije radi zastupanja u carinski odobrenom postupanju ili upotrebi robe bez prethodno izdate licence Ministarstva i upisa u Registar društava za špediciju (član 9. stav (1)),
 - b) jednom godišnje Ministarstvu ne dostavi ili pravovremeno ne dostavi dokumentaciju iz koje se može utvrditi da nisu prestali postojati zakonski uslovi za obavljanje špedicije (član 16. stav (1)),
 - c) ne prijavi ili blagovremeno ne prijavi promjenu podataka (član 14. stav (1)),
 - d) za poslove špedicije radi zastupanja u carinski odobrenom postupanju ili upotrebi robe zaposli ili izvan radnog odnosa angažuje lice koje nije upisano u Registar špeditera (član 6. stav (1) tačka d)),
 - e) posluje u poslovnom prostoru koji ne ispunjava propisane uslove (član 7.),
 - f) ako radno vrijeme ne uskladi sa radnim vremenom nadležne carinarnice u skladu sa članom 6. stav (2) ovog zakona.
- (2) Za prekršaj iz stava (1) ovog člana kaznit će se odgovorno lice u pravnom licu novčanom kaznom u iznosu od 300,00 do 1.000,00 KM.

V. PRIJELAZNE I ZAVRŠNE ODREDBE

Član 21.

(Donošenje podzakonskih akata i dužnost usklađivanja)

- (1) Ministar će donijeti podzakonske akte na osnovu ovlaštenja iz ovog zakona u roku od tri mjeseca od dana stupanja na snagu ovog zakona.
- (2) Korisnici važećih licenci za obavljanje poslova međunarodne špedicije u vezi sa carinjenjem robe, izdatih u skladu sa odredbama Zakona o posebnim uslovima za obavljanje poslova međunarodne špedicije u vezi sa carinjenjem robe ("Službene novine Federacije BiH", br. 46/00 i 37/01), mogu nastaviti poslovati pod uslovima iz licenci do ishođenja nove licence u skladu sa odredbama ovog Zakona.
- (3) Društvo za špediciju iz stava (2) ovog člana kome je po ranijim propisima izdata licenca za obavljanje poslova međunarodne špedicije u vezi sa carinjenjem robe dužno je u roku od šest mjeseci od dana stupanja propisa iz stava (1) ovog člana uskladiti rad i poslovanje sa odredbama ovog zakona i podnijeti zahtjev Ministarstvu za izdavanje licence u skladu sa članom 10. ovog zakona.
- (4) Društvu za špediciju koje ne uskladi svoje poslovanje s odredbama ovog zakona u roku iz stava (2) ovog člana prestaje pravo na obavljanje djelatnosti špedicije radi zastupanja u carinski odobrenom postupanju ili upotrebi robe, o čemu Ministarstvo donosi rješenje.
- (5) Dužnost usklađivanja sa odredbama ovog zakona u roku iz stava (3) ovog člana odnosi se i na poslovne jedinice odnosno podružnice kojima je po ranijim propisima o međunarodnoj špediciji koji su bili na snazi na teritoriji Federacije BiH do dana stupanja na snagu ovog zakona izdata licenca za obavljanje poslova međunarodne špedicije u vezi sa carinjenjem robe, a u suprotnom im

- prestaje pravo na obavljanje djelatnosti špedicije radi zastupanja u carinski odobrenom postupanju ili upotrebi robe, o čemu Ministarstvo donosi rješenje.
- (6) Protiv rješenja iz stava (4) i (5) ovog člana žalba nije dozvoljena, ali se može pokrenuti upravni spor kod nadležnog suda.

Član 22.
(Primjena dosadašnjih propisa)

Do donošenja podzakonskih akata iz člana 21. stav (1) ovog zakona, primjenjivat će se propisi doneseni na osnovu Zakona o posebnim uslovima za obavljanje poslova međunarodne špedicije u vezi sa carinjenjem robe ("Službene novine Federacije BiH", br. 46/00 i 37/01).

Član 23.
(Stručni ispiti položeni po ranijim propisima)

- (1) Stručni ispiti položeni po propisima o međunarodnoj špediciji koji su bili na snazi na teritoriji Federacije BiH do dana stupanja na snagu ovog zakona, a polagani pred komisijom imenovanom od nadležnog Ministarstva, izjednačeni su sa stručnim ispitom u smislu člana 8. ovog zakona.
- (2) Ministarstvo će u roku od šest mjeseci od dana stupanja na snagu ovog zakona evidentirati u Registru špeditera u elektronskoj formi fizička lica sa stručnim ispitom položenim po propisima o međunarodnoj špediciji koji su bili na snazi na teritoriji Federacije BiH do dana stupanja na snagu ovog zakona.

Član 24.
(Stručni ispiti započeti po ranijim propisima)

Stručni ispiti započeti po propisima o međunarodnoj špediciji koji su bili na snazi na području Federacije BiH dovršiti će se u skladu sa odredbama u to vrijeme važećeg propisa.

Član 25.
(Postupci započeti do dana stupanja na snagu ovog zakona)

Postupci započeti po propisima koji su važili do dana stupanja na snagu ovog zakona okončat će se po tim propisima.

Član 26.
(Prestanak važenja zakona)

Danom stupanja na snagu ovog zakona prestaje da važi Zakon o posebnim uslovima za obavljanje poslova međunarodne špedicije u vezi sa carinjenjem robe ("Službene novine Federacije BiH", br. 46/00 i 37/01).

Član 27.
(Stupanje na snagu Zakona)

Ovaj zakon stupa na snagu osmog dana od dana objavljivanja u "Službenim novinama Federacije BiH".

OBRAZLOŽENJE
PRIJEDLOGA ZAKONA O USLOVIMA ZA OBAVLJANJE POSLOVA ŠPEDICIJE
RADI ZASTUPANJA U CARINSKI ODOBRENOM POSTUPANJU ILI UPOTREBI
ROBE

I. Ustavni osnov za donošenje Zakona

Ustavni osnov za donošenje Zakona o uslovima za obavljanje poslova špedicije radi zastupanja u carinski odobrenom postupanju ili upotrebi robe, sadržan je u članu III.1.tačka b) koji je izmijenjen amandmanima VIII, LXXXIC i CVI na Ustav Federacije Bosne i Hercegovine, i članu IV.A.20.(1) d) Ustava Federacije Bosne i Hercegovine prema kojima je u isključivoj nadležnosti Federacije BiH utvrđivanje ekonomske politike, a Parlament Federacije BiH je, uz ostale nadležnosti utvrđene Ustavom, nadležan za donošenje zakona u vršenju funkcija federalne vlasti.

II. Razlozi za donošenje zakona

Zakonom o posebnim uslovima za obavljanje poslova međunarodne špedicije u vezi sa carinjenjem robe ("Službene novine Federacije BiH", br. 46/00 i 37/01), propisuju se posebni uslovi koje mora ispunjavati privredno društvo za obavljanje poslova međunarodne špedicije koji se odnose na zastupanje i obavljanje poslova u vezi sa carinjenjem robe. Ovim zakonom su, između ostalog, regulisani posebni uslovi koje mora ispunjavati privredno društvo registrovano za obavljanje poslova međunarodne špedicije u vezi sa carinjenjem robe, sadržaj zahtjeva za izdavanje odobrenja-licence za obavljanje poslova međunarodne špedicije u vezi sa carinjenjem robe, stručni ispit za radnike koji obavljaju poslove međunarodne špedicije u vezi sa carinjenjem robe, upravni nadzor i slično.

Imajući u vidu potrebu za potpunijim i preciznijim uređenjem predmetne oblasti, nije se pristupilo izmjenama i dopunama Zakona, budući da se nova rješenja koja on donosi nisu mogla pozicionirati u okviru osnovnog teksta, te bi izmjene i dopune obuhvatale više od polovine članova osnovnog teksta, što bi bilo suprotno odredbama Pravila za izradu zakona i drugih propisa Federacije BiH („Službene novine Federacije BiH“ broj: 71/14), te se pristupilo izradi novog Zakona.

Naime, s obzirom da je primjena važećeg Zakona prouzrokovala mnoge poteškoće u praksi, posebno imajući u vidu period kad je donesen važeći Zakon, pristupilo se izradi novog Zakona. Razlozi za donošenje novog Zakona zasnovani su i na potrebi da se na odgovarajući način regulišu pitanja za koja je u primjeni važećeg Zakona ocijenjeno da nisu uopće uređena, odnosno nisu uređena na dovoljno precizan način. Osim toga, važeći Zakon reguliše međunarodnu špediciju u vezi sa carinjenjem robe u kontekstu činjenice da je u tom periodu carinske procedure provodila Carinska uprava Federacije BiH, a formiranje Uprave za indirektno oporezivanje BiH je jedan dio odredbi ovog zakona učinilo neprimjenjivim. Također, u svojim godišnjim izvještajima o radu Federalna uprava za inspekcijske poslove, odnosno Federalni tržišni inspektorat, je u više navrata ukazao Federalnom ministarstvu trgovine na potrebu donošenja novog Zakona u ovoj oblasti s obzirom na poteškoće u primjeni važećeg Zakona. Također, s obzirom na sadržaj važećeg Zakona, i vremenski period njegovog donošenja, isti ne predviđa vođenje registara o špediterskim društvima odnosno špediterima u elektronskom obliku, što uvelike otežava Ministarstvu postupak izdavanja licenci i vršenje funkcije nadzora nad radom špediterskih društava odnosno špeditera. Registar društava za špediciju se trenutno vodi isključivo u pisanom obliku, što s

obzirom na značajan broj izdanih licenci za rad, neažuriranje podataka s obzirom da ne postoji zakonska obaveza za navedeno, te neusklađenost prekršajnih odredbi sa Zakonom o prekršajima Federacije BiH ("Službene novine Federacije BiH", br. 63/14 i "Službeni glasnik BiH", br. 41/22 - odluka Ustavnog suda BiH i 68/22 - odluka Ustavnog suda BiH i 19/25), čitavu oblast čini neuređenom i podložnom zloupotrebama. Osim toga, u skladu sa važećim Zakonom, trenutno ne postoji propisana obaveza društava za špediciju za obavještanje Ministarstva u smislu svih izmjena na licenci, odnosno ukidanja iste, što dovodi do problema prilikom rada društava i njihove komunikacije sa Upravom za indirektno oporezivanje BiH, kao i nemogućnosti ovog Ministarstva da vrši stvarnu kontrolu nad radom društava za špediciju. Navedene anomalije, odnosno rješenja za prevladavanje istih predviđena ovim zakonom su jedan od osnovnih motiva za donošenje istog.

Naime, Prednactom zakona se, u skladu sa ustavnim nadležnostima koje Federacija ima u ovoj oblasti, propisuju jasni uslovi koje privredna društva moraju da ispunjavaju za izdavanje licence, obaveza godišnjeg izvještavanja o radu društava za špediciju u kontekstu ispunjavanja uslova iz licenci i prestanak rada društava za špediciju.

Međunarodna špedicija definisana je važećim Zakonom i poslovima međunarodne špedicije u smislu ovog zakona smatraju se poslovi organizovanja, otpremanja i dopremanja robe u međunarodnom prometu koje društvo obavlja u svoje ime i za račun nalogodavca (u daljem tekstu: komitenta), u ime i za račun komitenta, odnosno u svoje ime i za svoj račun, kao i obavljanje drugih uobičajenih poslova i radnji u vezi s međunarodnom špedicijom, uz naknadu. Osim toga, međunarodna špedicija određena je kao usluga u vanjskotrgovinskom prometu Zakonom o vanjskotrgovinskom poslovanju Federacije („Službene novine Federacije BiH“, broj: 2/95) koji se još uvijek primjenjuje u onim dijelovima koji nisu u suprotnosti sa Zakonom o vanjskotrgovinskoj politici („Službeni glasnik BiH“, br. 7/98 i 35/04).

S obzirom da špedicija u međunarodnom prometu neminovno zadire u proces carinjenja robe, odnosno obuhvata poslove zastupanja u carinski odobrenom postupanju ili upotrebi robe, te je jasna potreba dodatnog regulisanja uslova za obavljanje navedene usluge odnosno djelatnosti. Navedeno je utjecalo i na promjenu naziva predloženog zakonskog rješenja u odnosu na raniji naziv Zakona (Zakon o posebnim uslovima za obavljanje poslova međunarodne špedicije u vezi sa carinjenjem robe), kako bi isti svojim nazivom konkretnije obuhvatio suštinu poslova koji se obavljaju u sklopu špedicije radi zastupanja u carinski odobrenom postupanju ili upotrebi robe.

U skladu sa Ustavom Bosne i Hercegovine carinska politika koja obuhvata i carinsko zastupanje, je u nadležnosti institucija Bosne i Hercegovine, no kako je špedicija u nadležnosti entiteta, te imajući u vidu da carinski propisi ne propisuju uslove koje društvo koje obavlja poslove špedicije mora ispunjavati za obavljanje poslova zastupanja pred carinskim organima za poduzimanje radnji i postupaka predviđenih carinskim propisima, odnosno ne propisuju sve uslove za obavljanje carinskog zastupanja, isti se određuju na razini entiteta, odnosno Brčko Distrikta, bilo kao dio postojećih propisa bilo kao zaseban propis. Navedeno je i posljedica specifičnog ustavnog uređenja Bosne i Hercegovine, uzimajući u obzir da se u zemljama u okruženju navedena materija reguliše ili kao dio Carinskog zakona (npr. Republika Srbija), kojim je propisano da poslove posrednog carinskog zastupanja može obavljati

samo pravno lice sa sjedištem u Srbiji, registrovano za međunarodnu špediciju i upisano u poseban registar kod Uprave carina (Republika Srbija) ili kao poseban propis koji na određen način objedinjuje carinsko zastupanje i otpremanje kao što je Zakon o uslovima za pružanje usluga carinskog zastupanja na snazi od 05.07.2018. godine. (Republika Hrvatska).

Kako je špedicija u nadležnosti entiteta, odnosno utvrđivanje uslova za obavljanje ove vrste djelatnosti, te je špedicija u međunarodnom prometu s obzirom na prirodu poslova koje po definiciji obuhvata povezana sa carinskim zastupanjem koje u Bosni i Hercegovini predstavlja dio carinske politike, za isti su relevantni i zakoni odnosno podzakonski akti doneseni na državnom nivou:

- Zakon o carinskoj politici Bosne i Hercegovine („Službeni glasnik BiH“, broj: 58/15) koji reguliše između ostalog carinsko zastupanje odnosno vrste istog, i
- Pravilnik o registraciji i upisu u Jedinstveni registar obveznika indirektnih poreza („Službeni glasnik BiH“, br. 51/12 i 68/16), koji određuje međunarodnu špediciju kao osnov za upis u Jedinstveni registar obveznika indirektnih poreza, odnosno dokumentaciju potrebnu za upis u Registar po osnovu obavljanja ove djelatnosti.

Zbog svega navedenog, potrebno je izraditi novi Zakon o uslovima za obavljanje poslova špedicije radi zastupanja u carinski odobrenom postupanju ili upotrebi robe, čijim odredbama bi se, u skladu sa nadležnostima entiteta u ovoj oblasti, omogućilo uređenje ove oblasti u skladu sa zahtjevima privrednog sektora, inspekcijskih organa, odnosno koji bi pružio rješenje praktičnih problema nastalim primjenom važećeg Zakona.

III. Obrazloženje predloženih rješenja

Rješenjem broj: 01-30-820/24 od 09.08.2024. godine, imenovana je Radna grupa za izradu Zakona o posebnim uslovima za obavljanje poslova međunarodne špedicije u vezi sa carinjenjem robe. Zadatak radne grupe je bio da pripremi tekst Prednacrt navedenog Zakona radi upućivanja u daljnju proceduru donošenja. Pored dva člana iz Federalnog ministarstva trgovine, članovi radne grupe su i predstavnik Federalne uprave za inspekcijske poslove, predstavnik Vanjskotrgovinske komore BiH, predstavnik Udruženja poslodavaca Federacije BiH, dok je Rješenjem broj: 01-30-820-1/24 od 10.10.2024. godine o dopuni gore navedenog Rješenja kao jedan od članova Radne grupe određen i predstavnik Novošped d.o.o. Tuzla.

Navedena grupa je održala dva sastanka, uvodni 05.11.2024. godine, na kojem su se iznijeli osnovni problemi s primjenom trenutnog Zakona te određene ideje odnosno prijedlozi kako oblikovati novo zakonsko rješenje. Na osnovu sastanka Federalno ministarstvo trgovine je pripremlilo radnu verziju Zakona te isto uputilo članovima radne grupe na mišljenje odnosno primjedbe i komentare. Na dostavljenu radnu verziju komentare su dali predstavnik društva Novošped d.o.o. Tuzla, Udruženja poslodavaca FBiH i predstavnik Federalne uprave za inspekcijske poslove. Drugi sastanak, realizovan s ciljem razmatranja dostavljenih komentara i primjedbi, održan je 26.02.2025. godine, i na istom se odlučivalo o ranije dostavljenoj radnoj verziji Zakona, odnosno o dostavljenim komentarima na istu. Nakon navedenog sastanka, Federalno ministarstvo trgovine, je na osnovu zaključaka sa sastanka i dodatnog usaglašavanja odnosno dorađivanja teksta Zakona isti uputilo na komentare članovima Radne grupe, a na isti članovi Radne grupe nisu imali komentara odnosno primjedbi.

S tim u vezi formulisani su članovi kako slijedi:

Federalno ministarstvo se opredijelilo za naziv: Zakon o uslovima za obavljanje poslova špedicije radi zastupanja u carinski odobrenom postupanju ili upotrebi robe. Iz naziva Zakona Federalno ministarstvo trgovine je uklonilo riječ međunarodna, s ciljem bar djelimičnog terminološkog usklađivanja sa Republikom Srpskom odnosno Distriktom Brčko, a i iz razloga što zastupanje u carinski odobrenom postupanju ili upotrebi robe podrazumijeva da je riječ o djelatnosti koja ima međunarodni karakter, odnosno odnosi se na radnje i postupke predviđene carinskim propisima. Međutim, imajući u vidu činjenicu da se međunarodna špedicija u tom terminu koristi prilikom registracije privrednih društava u Federaciji BiH, odnosno usluga koje će društvo obavljati u vanjskotrgovinskom prometu, kao jedan od uslova za izdavanje licence je zadržana obaveza društva podnosioca zahtjeva da registruje vanjskotrgovinsko poslovanje i u sklopu njega međunarodnu špediciju. Također, navedenu obavezu društva imaju i u skladu sa propisima Uprave za indirektno oporezivanje BiH, kao obveznici indirektnih poreza.

Naime, odredbama člana 4. tačka z) i aa) Zakona o carinskoj politici u Bosni i Hercegovini („Službeni glasnik BiH“, broj: 58/15) propisano je što se smatra carinski odobrenim postupanjem ili upotrebom robe, a šta carinskim postupkom, pa tako imamo da: 1) "carinski odobreno postupanje ili upotreba" znači: (a) stavljanje robe u carinski postupak, (b) unos robe u slobodnu zonu, (c) ponovni izvoz robe iz carinskog područja Bosne i Hercegovine, (d) uništenje robe, (e) ustupanje robe u korist države Bosne i Hercegovine; 2) "carinski postupak" znači: (a) puštanje robe u slobodan promet, (b) prevoz, (c) carinsko skladištenje, (d) unutrašnja obrada, (e) obrada pod carinskom kontrolom, (f) privremeni uvoz, (g) vanjska obrada, (h) izvoz.

U članu 2., se navodi da se ovim zakonom djelimično preuzima Uredba (EU) br. 952/2013 Evropskog parlamenta i Vijeća od 9. oktobra 2013. o Carinskom zakoniku Unije (SL L 269, 10. 10. 2013.), kako je posljednji put izmijenjena Uredbom (EU) 2016/2339 Evropskog parlamenta i Vijeća od 14. decembra 2016. o izmjeni Uredbe (EU) br. 952/2013 o Carinskom zakoniku Unije, u pogledu robe koja je privremeno napustila carinsko područje Unije morem ili zrakom (SL L 354, 23. 12. 2016.), s obzirom da navedena Uredba reguliše carinsko zastupanje.

U članu 3. je navedena odredba o rodnom značenju termina korištenih u Zakonu.

U članu 4. su navedeni osnovni termini koji se koriste u Zakonu s ciljem lakšeg razumijevanja istoga.

Članom 5. određuje se neprenosivost Licence za obavljanje poslova špedicije radi zastupanja u carinski odobrenom postupanju ili upotrebi robe i uvjerenje o položenom stručnom ispitu za špeditera izdatih u skladu sa ovim zakonom.

Članom 6. Zakona određuje se koje uslove društvo za špediciju mora ispunjavati za izdavanje licence i upis u Registar društava za špediciju.

Članom 7. određuju se uslovi u pogledu poslovnih prostora za obavljanje poslova špedicije radi zastupanja u carinski odobrenom postupanju ili upotrebi robe, odnosno određuje se da će se minimalno-tehnički uslovi koji se tiču opremljenosti poslovnih prostora, opreme i uređaja, utvrditi Pravilnikom.

Članom 8. propisuje se da će se stručna osposobljenost za obavljanje poslova špedicije radi zastupanja u carinski odobrenom postupanju ili upotrebi robe utvrđivati polaganjem stručnog ispita za obavljanje poslova špedicije radi zastupanja u carinski odobrenom postupanju ili upotrebi robe, te se utvrđuju uslovi za polaganje istog.

Članom 9. propisuje se šta treba sadržavati zahtjev za izdavanje licence i upis u Registar.

Članom 10. određen je rok za izdavanje licence kojom se utvrđuje da društvo za špediciju ispunjava uslove za obavljanje poslova špedicije radi zastupanja u carinski odobrenom postupanju ili upotrebi robe propisane ovim zakonom, te pravni lijek u vidu mogućnosti pokretanja upravnog spora.

Članom 11. propisuje se obaveza vođenja Registra društava za špediciju u pismenom i elektronskom obliku, te da će oblik i sadržaj navedenog Registra propisati ministar.

Član 12. određuje da je Registar društava za špediciju javan i da Ministarstvo objavljuje Registar društava za špediciju na Internet stranici Ministarstva.

Članom 13. određeno je da na zahtjev zainteresiranog lica Ministarstvo izdaje izvod iz Registra društava za špediciju, u roku od pet dana od dana prijema zahtjeva.

Članom 14. određeno je da su društva za špediciju dužna prijaviti svaku promjenu koja utiče na izdatu dozvolu, u svrhu izmjene licence odnosno podataka u Registru, te da Ministarstvo vrši izmjene licence i izmjenu podataka u Registru društava za špediciju po ovim zahtjevima ali i po službenoj dužnosti na osnovu podataka iz službenih evidencija nadležnih organa, kao i podataka utvrđenih u postupku nadzora koji se provodi u skladu sa ovim zakonom.

Članom 15. određuju se uslovi pod kojima se ukida licenca i briše društvo za špediciju iz Registra.

Članom 16. određeno je da je društvo za špediciju dužno jednom godišnje, a najdalje do 31.03. tekuće godine, Ministarstvu dostaviti izvještaj sa dokumentacijom iz kojeg se može utvrditi da nisu prestali zakonski uslovi za obavljanje poslova špedicije radi zastupanja u carinski odobrenom postupanju ili upotrebi robe, te da ministar podzakonskim aktom propisuje oblik, sadržaj i način dostavljanja izvještaja.

Članovima 17., 18. i 19. određeni su organi koji vrše nadzor nad provođenjem odredaba Zakona.

Članom 20. propisani su prekršaji i utvrđena visina novčanih kazni za te prekršaje.

Čl. 21. do 25. određuje se rok za donošenje podzakonskih propisa na osnovu ovog zakona, primjena dosadašnjih propisa na postupke i stručne ispite koji su pokrenuti prije stupanja na snagu Zakona kao i obaveza društava koja posjeduju licencu izdatu u skladu sa ranije važećim propisima da svoju organizaciju i rad usklade sa odredbama Zakona u roku od šest mjeseci od dana stupanja na snagu podzakonskih akata donesenih na osnovu ovog zakona. Također, propisuje se obaveza Ministarstva da u roku od šest mjeseci od dana stupanja na snagu ovog zakona evidentira u

Registru špeditera u elektronskoj formi fizička lica sa stručnim ispitom položenim po propisima o špediciji koji su bili na snazi na teritoriji Federacije BiH do dana stupanja na snagu ovog zakona.

Članom 26. određuje se stupanje na snagu zakona i prestanak važenja prethodnog propisa, te je propisano da danom stupanja na snagu ovog zakona prestaje da važi Zakon o posebnim uslovima za obavljanje poslova međunarodne špedicije u vezi sa carinjenjem robe ("Službene novine Federacije BiH", br. 46/00 i 37/01), te je propisano da Zakon stupa na snagu osmog dana od dana objavljivanja u „Službenim novinama Federacije BiH“.

IV. Usklađenost s propisima EU

Pravo Evropske unije sadrži izvore koji su relevantni za predmet uređivanja Zakona, a koje je predlagač uzeo u obzir prilikom njegove izrade, zbog čega u Izjavi o usklađenosti stoji ocjena „djelimično usklađeno“.

Odredbe *acquis-a* koje se odgovarajuće odnose na špediciju u svrhu zastupanja u carinski odobrenom postupanju ili upotrebi robe, dijelom su sadržane u Ugovoru o funkcionisanju Evropske unije u dijelovima koji se odnose na carinsku uniju (dio treći, poglavlje 2) član 33., koji se odnosi na carinsku saradnju.

U dijelu sekundarnih izvora prava EU, predlagač je vršio djelimično usklađivanje sa Uredbom Vijeća (EEC) 952/2013 Evropskog parlamenta i Vijeća od 09. oktobra 2013. godine, posljednja pročišćena verzija od 12.12.2022. godine. Naime, članom 18. navedene Uredbe, kojim se uređuje pitanje carinskog zastupnika, propisano je da države članice mogu, u skladu s pravom EU, odrediti uslove prema kojima carinski zastupnik može pružati usluge u državi članici u kojoj ima poslovni nastan. S tim u vezi, a kako je predmet ovog zakona obavljanje poslova špedicije radi zastupanja u carinski odobrenom postupanju ili upotrebi robe, Zakon je djelimično usklađen sa navedenom Uredbom obzirom da obuhvaća usklađivanje samo sa određenim dijelovima Uredbe, dok je ostalo nadležnost institucija BiH.

V. Finansijska sredstva

Za provođenje Zakona nije potrebno osigurati posebna sredstva iz Budžeta Federacije Bosne i Hercegovine.